

Իշխանն Մանիանին՝ Լամաւոյ, Ժեռմանկանն⁸⁰ եւ Անամուռին
Հալկամն.

Իշխանն Նորբերդոյ եւ Կամառտիասոյ՝ Սեւաստիանսն Հեռի.

Իշխանն Անդաւծին եւ Կուպային՝ Պաղտինն.

Իշխանն Մաղվայոյ եւ Սիկոյ եւ Պալապօլին՝ Կեռ Սակն.

Իշխանն Մանաւղատին եւ Ալարոյ՝ Միխայլն.

Իշխանն Լակռաւենոյ՝ Կոստանդինն եւ Նիկիֆօռն⁸¹.

Իշխանն Կալանաւնաւոսոյ, Այծուտապին, Սուրբ Սոփե եւ Նաղլաւին՝
Կեռ Վարդն⁸²»:

Ի դասս եպիսկոպոսաց զոր նախակարգէ պատմիչ մեր քան զաշխարհականս, չիք երկբայել զի գոյին եւ բազում այլ եպիսկոպոսք՝ ՚ի մարզից Հայոց Մեծաց՝ հրաւիրեալք, թէ եւ ոչ էր մարթ *ամենայն* եպիսկոպոսաց համահաւաքել, ըստ Կիրակոսի. որպիսիք են, յիշեալն ՚ի սմանէ **Անանիա** եպիսկոպոս Սեբաստիոյ, եւ յայլմէ յիշատակագրէ՝ **Ստեփանոս՝ Տիրացու** մականունեալն՝ արքեպիսկոպոս Վանտոսպայ, դրուատեալն ՚ի Ն. Լամբրունեցոյ եւ վկայ արժանաւորութեան իւրոյ. սա վաղագոյն հրաւիրեալ ՚ի կաթողիկոսէն ՚ի Հռոմկլայ, ոչ հայելով ՚ի ծերութիւն հասակին՝ չոգաւ առ նա, եւ անտի՝ ըստ գրելոյ ուղեկցի նորին *Յակովբայ* վարդապետի. «Ա՛յլ ճանապարհ առաջի եղաւ իմում Տեառնս եւ կաթողիկոսին Հայոց. զի կոչեցեալ եղեն ՚ի Լեւոմնէ, որ այժմ զվաղնջուցն ՚ի մերմէ ազգէ եւ զընկեցեալն յերեսաց տեսողին՝ զթագաւորական անուն՝ զոր ունէին Հայք, սա միայն ստացաւ, զօգոստական եւ զծիրանափայլ պատմութեանն. եւ ընկալաւ օծումն՝ որպէս զմեծն Տրդատ, կամակցութեամբ արիական ազգին Յունաց, (փոխանակ գրելոյ Փռանկաց կամ Հռովմայեցւոց), բերեալ նմա նշան զխաչանիշ թագն. եւ նորա պատուասիրաբար կոչեցեալ զհոգեւոր Տէր Գրիգորիս, զի երթիցէ եւ օծցէ զնա սրբաբար եւ մաքրագործակ միւռոնաւն, եւ պսակեցէ զգլուխն խաչանշան դրոշմաւ. եւ Հոգեւոր Տեառն ընդ իւր առեալ զիմ Տէրն», եւ այլն: Յայտ է թէ ընդ սոսին՝ առնոյր տանէր ընդ իւր կաթողիկոսն՝ եւ զեպիսկոպոսունս հայրապե-

⁸⁰ Սմբատ՝ *Ժամնկանն*:

⁸¹ Սմբատ, «Պարոն Կոստանդին տէր Լակռաւենոյ, Պարոն Նիկիֆօրիդ եղբայրն»:

⁸² Սմբատ *Աղօլ* գրէ զՆաղլօն, եւ փոխանակ երեցուն այլոցն՝ կարգէ նոր անուն՝ *Կոստրաս*: